

INUIT ATAQATIGIIT INATSIARTUNI



UPA2025/163

22.okt.2025

Nivi Heilmann Efraimsen

**Nunatsinni atuarfinnut namminersortunut aningaasatigut
tapiissuteqartannginnissamut Naalakkersuisut inatsisissatut
siunnersuummik suliaqaqqullugit Inatsisartut aalajangiiffigisassaattut
siunnersuut. Inatsisissatut siunnersuut kingusinnerpaamik UKA2026-
mi saqqummiunneqassaaq.**

Inatsisartunut ilaasortaq Kuno Fencker, Naleraq

Oqaaseqaat.

Naapertuilluarnerua meeqqat immikkoortitissallugit? Naapertuilluarnerua nuna
namminersulerusuttoq namminersortunut nunaminni siuarsaaqataasunut
tapersersuissanani?

Inuit Ataqatigiinniit isumaqarpugut assigiinngisitaarnerput ataqqillugu meeqqat
atuarfiinnik namminersortunik ingerlatsinerit ajunngitsuusut
tapersertortariaqartullu. Taamatut isumaqarpugut pissutigalugu meeqqat
tamarmik atuartussaataammata immikkoortinneqartussaanaatillu, tamarmillu
sumiluunniit atuaraluarunik assigiimmik aningaasatigut taperneqartussaallutik,
apeqqutaatinnagu sumi atuarneq, namminersortuni imaluunniit pisortat
atuarfiutigippassut.

Inuit Ataqatigiinniit isumaqarpugut una siunnersuut meeqqat pineqartut
eqqarsaatigalugit naapertuilluarnerunngitsoq, pissutigalugu tamat
oqartussaaqataanerat eqqarsaatigalugu nunamilu ilinniartitaanikkut
qaffassagassaaqisumi periarfissat annertusartuarnissannik killilersuinerummat.

INUIT ATAQATIGIIT INATSIARTUNI



Siunnersuuteqartup ilaatigut tunngavilersuutigivaa, angajoqqaat namminneq toqqaasinnaanissaat pisinnaatitaaffiat akueralugu. Taamaattorli atuarfinnut namminersortunut aningaasatigut tapiissutit peerneqarnissaat anguniarlugu. Inuit Ataqtigiiinniit tamanna meeqqanik immiikkoortitsinertut isigaarput. Meeraq kinaluunniit sumi atuaraluaruni tunngaviusumik atuarnissaannut pisortanit aningaasaliiffigineqartariaqartoq.

Kalaallit Nunaanni isorartoqisumi najugaqarpugut, tamanna tamatta ilisimalluarparput, atuartussaataanerullu aqqani ilaatigut savaatillit ilaasa qitornatik namminneerlutik atuartittariaqartarpaat. Tamakku tamarmik siunissamut periarfissaajuarnissaat Inuit Ataqtigiiinniit pingaartipparput.

Aamma una iluatsillugu eqqaarusupparput nuna tamakkerlugu angusat naatsersueqqissaartarfiup naatsersugai malillugit ukiuni kingullerni amerlasuuni atuarfiit namminersortut agguaqatigiisillugu angusarissaarfiusumik inerititaqartartuusut ingerlalluartaartartullu. Minnerunngitsumillu inuiaqtigiiinnik kivitseqataasut sutigut tamatigut tapersersorneqarnissaat kissaatigigatsigu.

Inuit Ataqtigiiinniit oqaatigerusupparputtaaq meeqqanik immikkoortitsineq akuerinnginnatsigu. Qanorluunniit angajoqqaat namminneq toqqaasinnaanerat eqqartorneqaraluarpat.

Taamatut Inuit Ataqtigiiinniit oqaaseqarluta siunnersuutigineqartoq itigartipparput.